

# 先德餘香

南條文雄編纂

圓山宴詩稿 (六月十日集之續)

圓山讌集

大含(時爲擬寮司一歟)

熱際安居衆、禪餘會梵臺、山隣龍谷出、閣對鳳城開、法味和羹任、雄心負笈才、羞吾僧薦淺、恩遇許趨陪、

同

寂秀

界外清涼偶此求、縱遊相對夕陽樓、帝城氣色炎雲散、鳧水晴光匹練流、攘臂新詩歌且和、披襟綠酒獻還酬、不妨長樂鐘聲晚、幸見東山白月浮、

同

麟定

東山高閣一徘徊、極目乾坤萬象開、臺上雄風驅苦熱、城頭過雨洗塵埃、披襟共唱清涼品、移榻同傾甘露杯、縱有陪遊宋生似、醉來賦就愧詞才、

同

難量

城頭高擢一層樓、捲慢風烟掌上浮、數點青山晴入畫、千齡玉樹冷如秋、更疑香積頌佳味、阿羨平原恣壯遊、此會豈容携妓客、只教詩酒足歡留、

同

義天

詞客登臨百尺臺，洛陽一望火雲開，陪遊終日耽詩句，遮莫山中暮色催、

同

隨現

東山路不迷，親侶幾攀躋，深樹鳴蟬集，閑園嬌鳥棲，嶺頭雲出岫，門外草盈溪，高閣千門上，帝城一水西，飛觴歌古調，揮筆試新題，看取風光好，醉來各若泥、

同

大惠

山上深林裏，攀登百尺樓，清風綠陰動，高頂白雲流，回首憐佳景，揮毫賦壯遊，自成京邑客，避暑始忘愁、

又

圓山飛閣倚崔嵬，此日遊人啣酒盃，坐久醉顏題賦處，爭章詞客本奇才、

同

賢明

曾聞納涼地，探勝共相求，攀盡圓山頂，俯看長水流，題詩支遁興，揮筆右軍遊，對酒情無極，誰知象外幽、

同

若天

誰道蓬萊路自遐，平安東廓梵王家，赤城霞彩看難盡，揮筆何妨白日斜、

同用「故隨惠師韻」

法電

同侶相携陪勝遊，洛都風色滿層樓，拙毫豈耐酬恩遇，醉去醉來各自休、

同用「法兄月藏尊者韻」

大舍

海外何勞問雪宮，振衣銀界倚虛空。法雲纔覆人天座，慈雨時過草木中。已有獅筋驅毒獸，寧無塵尾起清風。共斟甘露論心地，不管杯蛇墜漆弓。

同奉和龜洲講師玉韻

法海

一室他方衆，寧論故與新。風流皆落落，才氣競彬彬。水樹看含雨，莓筍自絕塵。乍聞歌白雪，和曲更何人。

同

住靜

東山幽靜地，敬從興尤新。座覺烟霞富，德看文質彬。仙鴉群鼎味，神燕拂梁塵。依舊有高調，何須讓古人。

同

難量

關士留輿處，偏驚紫氣新。鉢龍看蜿々，腕鬼鬪彬彬。竹籟驅炎熱，松濤灑俗塵。披襟堪作賦，和郢更無人。

同

亮天

花樂風烟滿帝畿，如雲龍象白毫暉。莫辭今日爭般若，夕景無心入戶扉。

同

法海

眼中山水壯王畿，共舉金盃待月暉。深喜俗塵都不染，清風時入石門扉。

同

文海

圓山層閣古王畿，炎靄消時倚落暉。此日同盟東北客，興來共醉白雲扉。

德成

四方兄弟集神畿、祇樹林邊共夕暉、乘興新篇皆若玉、琤々清韻繞巖扉、

同

賢僮

吉水樓臺俯帝畿、禪餘卜日奉恩暉、良朋未飽清涼興、長樂鐘聲落暮扉、

同

住靜

圓山眺望屬王畿、社酒風流酌夕暉、醉裡詩成耐三笑、飄然却訝虎溪扉、

同

寶善

芙蓉高閣擢皇畿、詞客隨來才氣暉、日暮風流歌一曲、忘歸未出白雲扉、

(嗣出)